

VODIČ O OBRAZLOŽENOJ SUDSKOJ ODLUCI

(2018. Ustavni sud Bosne i Hercegovine,
The AIRE Centre, 191. str.)

prikaz

Priredili: **mr. sci. Arben Murtezić***
dr. sci. Davor Trlin**

Ustavni sud Bosne i Hercegovine i AIRE Centar (The AIRE Centre Advice on Individual Rights in Europe) su 2018. godine izdali Vodič o obrazloženoj sudskoj odluci. Vodič je nastao na osnovu preporuka Pravosudnog foruma za Bosnu i Hercegovinu. Prva godišnja konferencija u okviru navedenog foruma održana je 06./07.11.2017. godine u zajedničkoj organizaciji Ustavnog suda BiH i AIRE Centra i u saradnji s Visokim sudskim i tužilačkim vijećem Bosne i Hercegovine.

Vodič se sastoji od dvije cjeline. Prva se odnosi na Evropsku konvenciju o ljudskim pravima i osnovnim slobodama sa praksom Evropskog suda za ljudska prava. Posebno je obrazložen standard prava na obrazloženu sudsku odluku u EKLJP, da se „mora vidjeti da je pravda zadovoljena“. Praksa Evropskog suda za ljudska prava je ovdje razvrstana na tri grupe-na krivične predmete (*Hadjianastasio protiv Grčke, Salov protiv Ukrajine, Taxquet protiv Belgije, Gorou protiv Grčke, Vidaković protiv Crne Gore, Mugoša protiv Crne Gore*) na građanske predmete (*H. protiv Belgije, Ruiz Torija protiv Španije, Hiro Balani protiv Španije, Helle protiv Finske, Garcia Ruiz protiv Španije, Hirvisaari protiv Finske, Bufferne protiv Francuske, Suominen protiv Finske, Sakkopoulos protiv Grčke, Buzescu protiv Rumunije*) i na upravne predmete (*Tatishvili protiv Rusije, Atanasovski protiv Makedonije*).

Druga cjelina se odnosi na Ustav BiH, te izabrane ogledne primjere iz prakse Ustavnog suda Bosne i Hercegovine, u kojima su, u krivičnim, građanskim, odnosno upravnim predmetima nisu, odnosno jesu ispunjeni standardi obrazložene sudske odluke.

* Direktor Javne ustanove Centar za edukaciju sudija i tužilaca u Federaciji BiH.

** Viši stručni saradnik Javne ustanove Centar za edukaciju sudija i tužilaca u Federaciji BiH;
davor.trlin@cest.gov.ba

Jedna od preporuka (ukupno 18) sa navedene konferencije Pravnog foruma je bila da je potrebno organizatorima ove konferencije inicirati izradu jedne brošure/smjernica za obrazloženu odluku u sudovima s ciljem obezbjeđenja ujednačene zaštite prava na pravično suđenje s aspekta prava na obrazloženu odluku, boljeg edukovanja sudija i drugih učesnika u postupku. S tim u vezi, organizatoru se sugerisalo da pripremi nacrt vodiča (smjernica) koji bi se prije konačne izrade i distribucije dostavio učesnicima ove konferencije na komentar, sugestije i prijedloge. Tako je i urađeno i kao rezultat je bila izrada i objavljivanje ove publikacije koju preporučujemo stručnoj i naučnoj javnosti.

Publikacija je predstavljena na tri seminara CEST-a Federacije BiH, od strane predstavnika Ustavnog suda BiH, Mensura Karasalihovića, šefa Apelacionog odjeljenja Ustavnog suda BiH; Mirsad Ćemana, potpredsjednika Ustavnog suda BiH, te Ermina Dumanjića, šefa Odjeljenja za Ustavnosudsku praksu Ustavnog suda BiH.